

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 2, No. 118

原始資料: 蕭鎮國大德提供 / 張文明大德二校, 維習安大德提供, 北美某大德提供

## No. 118 [No. 99(1077), No. 100(16), No.125(38.6), Nos. 119-120]

### 佛說鳩掘摩經

#### 西晉月氏國三藏竺法護譯

聞如是。一時佛遊舍衛國祇樹給孤獨園。與大比丘五百眾俱。舍衛城中有異梵志。博綜三經無所疑滯。具暢五典所問即對。精生講肆莫不稟仰。國老諮詢群儒宗焉。門徒濟濟有五百人。上首弟子名鳩掘摩(晉曰指鬢)

。儀幹剛猛力超壯士。手能接飛走先奔馬。聰慧才辯志性和雅。安詳敏達一無疑礙。色像第一師所嘉異。室主欽敬候夫出處。往造指鬢而謂之曰。觀爾顏彩有堂堂之容。推步年齒相覺不殊。寧可同歡接所娛乎。指鬢聞之惶怖懼。毛衣起豎跪而答曰。夫人比母師則當父。猥垂斯教儀不敢許。心所不甘甚非法也。師婦又曰。飢者與食渴給水漿有何非法。寒施溫衣熱惠清涼有何非法。裸露復之危厄救之有何非法。指鬢答曰。赴趣患急寬濟窮頓實無非法。夫人母也。師之所重。隨姪著色慢犯非宜。如蛇蠍體服毒蘊。師室聞之即懷愧恨。歸自總滅裂衣裳。鬱金黃面佯愁委臥。時夫行還。問曰。何故有何不善。誰相觸。室人譖曰。君常所歎聰慧弟子。柔仁貞潔履行無闕。君且不在來見牽掣。欲肆逆慢妾不順從。而被陵侮摧挫委頓。是以受辱不能自起。師聞悵然意懷盛怒。欲加楚罰掠治姦暴。慮之雄霸非力所伏。退欲靜默深惟不道。穢染閨閣上下失序。進退沈吟將如之何。乃咿唔歎曰。當微改常倒教而教。教使殺人限至于百。各貫一指以鬢其額。殺人之罪罪莫大焉。不加楚酷必就辜戮。現受危沒沒墮地獄。不可釋置縱使滋甚也。

於是師命指鬢而告曰。卿之聰慧所學周密。升堂入室精生無首。唯之一藝未施行耳。指鬢進曰。願聞所告。師曰。欲速成者宜執利劍。晨於四衢躬殺百人。人取一指以為傅飾。至于日中使百指滿。設勤奉遵。則道德備矣。便以劍授。指鬢受劍聞告愕懼。心懷愁感。設違教旨非孝弟子。順而行之畏陷失理。奉劍而退垂淚言曰。淨修梵行則梵志法。孝養父母則梵志法。修為眾善則梵志法。不邪正歸則梵志法。柔和仁惠則梵志法。弘慈四等則梵志。法得五神通則梵志法。超上梵天則梵志法。今暴伐殺非法失理。躊躇懊惱當如之何。即詣前樹四衢路側。悲怒激憤惡鬼助禍。耗亂其心瞋目噴吒。四顧遠視如鬼師子。如虎狼獸跳騰馳踊。色貌可畏行者四集。悉當趣城即奮長劍多所殺害。莫不逆怖值無遺脫。去來往返而無覺者。無數之眾稱怨悲叫。入趣王宮告有逆賊。遮截要路害人不少。唯願天王。為民除患。時諸比丘入城分衛見諸告者。

恐怖如是。分衛還出飯食畢訖。往詣佛所稽首足下白世尊曰。見國人眾詣王宮門。告大逆賊名曰指鬚。手執利劍多所危害。體掌污血路無行人。

爾時世尊告諸比丘。汝等且止。吾往救之。佛從坐起尋到其所。道逢芻牧荷負載乘。佃居民眾白世尊曰。大聖所湊勿由斯路。前有逆賊四徼道斷。取殺狼藉唯改所從。又且獨步無侍衛故也。世尊告曰。設使三界盡為寇虜吾不省錄。況一賊乎。指鬚之母怪子不歸。時至不食懼必當飢。齋餉出城就而餉之日欲向中百指未滿。恐日移昧道業不具。欲還害母以充其數。佛念指鬚若害母者。在不中止罪不可救。佛便忽然住立其前。時鷲掘摩見佛捨母。如師子步往迎世尊。心自念言。十人百人見我馳近不敢當也。吾常奮威縱橫自恣。況此沙門獨身而至。今我規圖必勦其命。即執劍趣佛不能自前竭力奔走亦不能到則心念曰。我跳度江河解諸繫縛。投捭勇猛曾無匹敵。重關固塞無不開闔。而此沙門徐步裁動我走不及。殫盡威勢永不摩近。指鬚謂佛。沙門且止。佛告逆賊。吾止已來其日久矣。但汝未止。時鷲掘摩遙以偈頌曰。

寂志語何謂 自云已停跡

斯言何所趣 以我為不止

今佛云何立 謂身行不住

反以我若茲 願說解此義

於是世尊為指鬚頌偈。而告之曰。

指鬚聽佛住 世尊除君過

汝走無智想 吾定爾不止

吾安住三脫 樂法修梵行

汝獨驅癡想 懷害今未止

大聖無極慧 讀寂於四衢

尋聞所說罪 聽采詠法義

於是指鬚心即開悟。棄劍稽首自投于地。唯願世尊。恕我迷謬。興害集指念欲見道。僥幸慈化乞原罪疊。垂哀接濟得使出家受成就戒。佛則授之即為沙門。

爾時世尊威神巍巍。智慧光明結加趺坐。賢者指鬚翼從左右。還至祇樹給孤獨園。指鬚蒙化眾祐所信。諸尊弟子亦共攝持。其族姓子。下鬚髮者則被法服。以家之信捨家為道。具足究竟無上梵行。得六通證生死已斷。稱舉淨德所作已辦。解名色本即得應真。

時王波私匿(晉號和悅)

。與四部眾象馬步騎。嚴駕出征欲討穢逆。其身疲弊而被塵土。過詣佛所稽首足下。佛問。王曰。從何所來身被塵土。王白佛言。唯然世尊。有大逆賊名鷲掘摩。兇暴懷害斷四徼道。手執嚴刃傷殺人民。今故匡勒四部之眾欲出討捕。是時指鬚在於會中。去佛不遠。佛告王曰。指鬚在此。已除鬚髮今為比丘。本與云何。王白佛言。已志于

道無如之何。當盡形壽給其衣食臥起床坐病瘦醫藥。又問世尊。唯然大聖。凶害逆人焉得至道履行寂義乎。今為安在。佛告王曰。近在斯坐。王遙見之。心即懷懼衣毛為豎。佛言。大王。莫恐莫懼。今以仁賢無復逆意。王造禮之謂曰。賢者。是指鬘乎。答曰。是也。王又問曰。仁姓為何。曰。奇角氏。又問。何謂奇角氏。曰父本姓。王曰。唯奇角子受吾供養。衣食床臥病瘦醫藥各盡形壽。即然所供。王以獲許稽首辭還。歎世尊曰。能調諸不調。能成諸未成。安住垂大慈。無所不開道。消伏患逆使充法會。亦令黎庶逮斯調定。我國多事意欲請退。佛告。便去從志所奉。王禮佛足稽首而歸。

爾時賢者指鬘。處於閑居服五納衣。明旦持鉢入舍衛城普行分衛。見有諸家懷妊女人。月滿產難心歸怙之。問指鬘曰。欲何至趣唯蒙救濟。指鬘得供出城食畢。澡竟去器獨坐加敬。詣佛稽首白世尊曰。我朝晨旦著衣持鉢入城分衛。見有女人臨月欲產。產難恐懼求見救護。佛告指鬘。汝便速往謂女人曰。如指鬘言至誠不虛。從生已來未嘗殺生。審如是者。姊當尋生安隱無患。指鬘白佛。我作眾罪不可稱計。發九十九人一不滿百。而發此言豈非兩舌乎。世尊告曰。前身異世今生不同。是則至誠不為妄語。如斯用時救彼女厄。即奉聖旨往到女所。如佛言曰。如我至誠所言不虛。從生以來未曾殺生。審如是者。當令大姊安隱在產。所言未竟女尋婉軀兒亦獲安。

爾時指鬘入舍衛城。群小童輩見之分衛。或瓦石擲或以箭射。或刀斫刺或杖捶擊。賢者指鬘。破頭傷體衣服破裂還詣佛所稽首足下起於佛前頌曰。

|       |       |
|-------|-------|
| 我前本為賊 | 指鬘名普聞 |
| 大淵以枯竭 | 則歸命正覺 |
| 斯以成忍辱 | 逮佛開化眾 |
| 聽經常以時 | 是故無躓礙 |
| 今已歸命佛 | 受真諦法戒 |
| 逮得三通達 | 則順諸佛教 |
| 昔暴懷兇毒 | 多傷眾類命 |
| 雖古多所危 | 吾今名無害 |
| 身口所犯過 | 志懷殺害心 |
| 其不危他餘 | 未曾遭諸厄 |
| 又復無過去 | 持其法寂然 |
| 應受凶暴名 | 自調成仁賢 |
| 以才一調定 | 如鉤調諸象 |
| 如來成就我 | 無劍亦無杖 |
| 其前為放逸 | 然後能自制 |
| 彼明焰於世 | 由日出於雲 |

假使犯眾惡 不斷眾善德  
彼明炤於世 由雲消日出  
若新學比丘 勤修於佛教  
其明炤於世 如月盛滿時  
其有犯眾罪 當歸於惡道  
不復難諸患 服食無所著  
亦不求於生 未曾會德死  
唯須待時日 心常志於定  
如是鳩掘摩 已得成羅漢  
在佛世尊前 口自頌斯偈

佛說如是。賢者指鬘及諸比丘眾。聞經歡喜奉行。

### 佛說鳩掘摩經